

每週經課朗誦經文(巴克禮台語漢字)2013/03/10

共同經課 - 1 約書亞記五章九節~十二節

9 耶和華對約書亞講：「我今仔日將埃及的凌辱移徙離開恁。」對按呢，彼所在名叫吉甲，直到今仔日。10 彼時以色列人紮營佇吉甲。彼月十四下昏，佇耶利哥的平洋守搬(pôaⁿ)過節。11 搬(pôaⁿ)過節的隔日，in就食彼所在所出的；抵抵彼日食無酵餅及烘的五穀。12 in食彼所在所出的隔日嗎哪就停歇，以色列人也無閣有嗎哪。彼年，in就食迦南地的土產。

共同經課 - 2 詩篇三十二篇

1 [大衛的教示的詩。] 過失得著赦免，罪過得著遮蓋者，這人有福氣！2 耶和華無算伊做有罪，伊的心無奸詐者，這人有福氣！3 我靜靜的時，我的骨頭枯焦。因為我通日大聲哮。4 因為暝日，你的手重重扼我；我的精液，變親像夏天的乾燥。(細拉)5 我對你排列我的罪過，無隱瞞我的罪惡。我講：我欲對耶和華承認我的過失，你就赦免我犯法的罪。(細拉)6 因為按呢，見若虔誠的人佇通尋著你的時著祈禱你；大水氾濫的時，的確袂到伊遐。7 你是我閃匿的所在；你欲庇佑我脫離艱苦，你欲用得救的歌四面圍我。(細拉)8 我欲教示你，指示你應該行的路；我欲注目看你來勸戒你。9 嘔通親像馬、騾，in無智識，著用馬咬韁馬勒索約束in；若無，in就嘔倚近你。10 歹人受多多苦難；獨獨倚靠耶和華的人欲有慈愛四面圍伊。11 恁義人啊，著因為耶和華來歡喜快樂；心正直的人啊，恁著出歡喜的聲。

共同經課 - 3 哥林多後書五章十六節~二十一節

16 所以，阮對今以後，無照肉體識人。雖然曾照肉體識基督，今以後無閣按呢識伊。17 所以人若惦佇基督，就是做新創造的，舊的代誌已經過去，今攏變成新的。18 閣萬項事攏是出佇上帝；伊對基督互咱及伊復和，也將此個勸人及上帝復和的職份互阮；19 就是上帝惦佇基督，互世間及伊復和，無將in的罪過歸佇in，也將復和的道理交託阮。20 按呢，阮為著基督做欵差，親像上帝用阮勸恁。阮為著基督求恁及上帝復和。21 上帝互彼個無罪的，替咱成做罪，是欲互咱惦佇伊來成做上帝的義。

共同經課 - 4 路加福音十五章一節~三節，十一b節~三十二節

1 眾抽餉的及歹人啲就近耶穌來聽伊。2 法利賽人及經學士耦耦唸講：「此個人接納歹人，續及in食。」15:3 耶穌設此個譬喻對in講：11 「某人有二個子。12 彼個第二個給老父講：『阿爸啊，將我應得的業分互我。』伊的老父就給in分家伙。13 閣無幾日，彼個第二子一盡收拾伊的物，出外去遠遠的所在。佇遐放蕩，毀壞伊的業。14 已經損了了，抵著彼所在大飢荒，伊才知欠缺的艱苦。15 就去倚彼所在一個百姓；彼人差伊去山裡飼豬。16 愛將豬所食的豆莢來止飢，也無人互伊。17 伊醒悟，就講：『我的老父有佹多長工，米糧食有剩，若是我佇遮啲欲餓死啊！18 我欲起來，去尋我的老父，給伊講：阿爸啊！我有得罪天，及佇你的面前；19 今了後，我袂堪得叫做你的子，著互我親像你的長工的一個。』20 就起來，去尋伊的老父。相離猶久遠，伊的老父看見伊，就憐憫伊，走去抱伊的頷頸，直直給伊啜。21 子就給伊講：『阿爸啊！我有得罪天，及佇你的面前；今了後，袂堪得叫做你的子。』22 若是老父對伊許個奴僕講：『緊緊擻(hiahⁿ)上好的衫來給伊穿；閣給伊掛手指；續給伊穿鞋；23 也牽彼隻肥的牛仔來刳，咱食來歡喜；24 因為我此個子死有復活，失落有閣得著。』in就相及歡喜。25 彼時，伊的大子佇園裡。倒來欲到厝，聽見作樂及跳舞的聲，26 就叫一個奴僕來，問伊啲啥代。27 伊給伊講：『恁小弟來啦；恁老父因為得著伊好好倒來，所以刳彼隻肥的牛仔。』28 大子受氣，嘔入去；伊的老父出來勸伊。29 伊應伊的老父講：『你看，我服事你許多年，攏未曾違逆你的命令，你也未曾互我一隻羊仔子，通及我的朋友相及喜歡。30 總是你此個子，交陪娼妓一盡破費你的業，一下倒來，你就為著伊刳肥的牛仔。』31 老父就給伊講：『子啊！你常常及我佇啲，凡我所有的攏是你的；32 若是你此個小弟死有復活，失落有閣得著，咱應該著歡喜快樂。』」